

氏族典第二百九十三卷

方姓部彙考

鄭樵通志 以字爲氏

周人字

方氏周大夫方叔之後以字爲氏風俗通云方雷氏之後漢有方賀唐有詩人方干嚴州人宋朝方姓爲著姓閩中爲多望出河南

廖用賢尙友錄 方姓

方河南商音

方姓部列傳一

陶唐氏 方回

按後漢書周磐傳昔方回支父嚮神養和不以榮利滑其生術注列仙傳曰方回堯時隱人也堯聘之練食雲母隱於五柞山至夏啟求爲人所却閉之室中從求道回化而去

周 方叔

按詩經采芑方叔涖止其車三千師干之試傳方叔卿士也受命而爲將也

後漢 方望

按後漢書隗囂傳囂季父崔起兵應漢以囂素有名推爲上將軍囂遣使聘請平陵人方望以爲軍師望至說囂曰足下欲承天順民輔漢而起今立者乃在南陽王莽尙據長安雖欲以漢爲名其實無所受命將何以見信於衆乎宜急立高廟稱臣奉祠所謂神道設教求人神者也囂從其言

方儕

按萬姓統譜儕淳安人與弟儲儼以孟氏易自相講授儕爲南陽太守封關內侯以文學知名世傳其昆弟皆爲仙蓋出於附會云

方儲

按尚友錄儲字聖公歙人其地在今淳安講孟氏易精通圖讖建初間舉賢良方正對策爲天下第一拜議郎轉洛陽令後贈尚書令封黟縣侯世傳其仙去兄儕弟儼俱有學行儲爲郎中章帝使文郎居左武郎居右儲正住中曰臣文武兼備在所施用上嘉其才以亂絲付儲使理儲拔佩刀三斷

之對曰反經任勢臨事亦然

方儼

按萬姓統譜儼爲大都督以文學知名

方賀

按鄭樵通志漢有方賀

晉 方操

按萬姓統譜操字持志淳安人磊落方正英秀雄偉孔羣嘗奏操執心正直積德慈仁累官至諫議大夫尙書僕射封上虞縣公

唐 方亮

按萬姓統譜亮雉山人初汪華據歙稱王睦州已爲歙有及武德四年杜伏威命王雄誕平歙而復睦州用亮爲刺史武德五年八月使亮持節領廬申二州諸軍事亮當唐初嘗不因朝命爲刺史其後納土歸化免其鄉里屠戮之苦誠節彰著可嘉也

方竦

按萬姓統譜竦弋陽人景雲初進士累官鸞臺侍郎開元初封禪爲禮儀使容止閑雅元宗歎其知禮封雲亭侯

方元蕩

按萬姓統譜元蕩旌德人永貞初授冠軍大將軍元和中進御史大夫封河南郡王以兵從征吳元濟有功詔嘉之

方干

按尚友錄干字雄飛桐廬人咸通中舉進士不第隱鏡湖上時徐凝有詩名一見干器之授以詩律干頗陋又免闕而喜陵侮嘗謁廉帥誤三拜人號方三拜晚遇醫補其胥又號爲補胥先生其詩多警句門人私謚曰元英先生

方昊

按十國春秋吳越方昊字太初青溪人生於唐末唐亡恥非所仕遯隱巖谷中武肅王嘗招之不肯

往聚徒講學終其身鄉人化之稱爲靜樂先生

方從訓

按十國春秋吳方從訓父虔爲太祖守將總兵戍寧國以備兩浙已而爲吳越所禽從訓遂代虔守寧國頗以扞禦著功子孫世爲寧國人

宋 方綱

按宋史方剛傳綱池州青陽人八世同爨家屬七百口居室六百區每旦鳴鼓會食嘗出稻五千簞振貸貧民景德二年轉運使馮亮以聞詔旌其門

方慎言

按莆田縣志慎言字應之父延範慎言舉咸平三年進士知信豐蘭溪二縣號稱神明祥符初以殿中丞受詔往淄青數郡均給蠶賦使還稱旨擢屯田員外仁宗卽位改侍御史請便郡知泉州歲飢奏免丁稅全活者衆歷兩浙轉運使改知潭州入爲諫議大夫會擇重臣鎮南越遂以朝請大夫知廣州卒贈開府儀同三司

方慎從

按萬姓統譜慎從字惟之慎言弟也景德二年登進士甲科授祕書省祕書郎歷知弋陽懷寧同安懷安導江蘭溪六縣通判饒州荆南府知潮漳嘉三州再知漳州改都官郎中以老歸卒慎從所至有德于民在導江日有楠木連理嘉禾九穗之祥璽書褒異守漳日適慎言守泉州旌麾相望二州人榮之及再至漳人夾道歡呼曰吾父復來矣子諫臣侍慎從官于漳手斷合水孽蛟死漳人憐而祠之得封清水侯

方偕

按宋史方偕傳偕字齊古興化莆田人及進士第爲温州軍事推官遷祕書省著作佐郎歷知福清資陽縣累遷尙書屯田員外郎爲御史臺推直官知雜事龐籍薦爲御史裏行再遷侍御史爲開封府通判江南安撫三司歲出乳香綿綺下州郡配民偕奏罷之更鹽鐵判官遷兵部員外郎改度支副使擢天章閣待制江淮制置發運使知杭州遷刑部郎中偕以吏事進治杭州有能聲喜飲酒至酣宴無節數月暴中風以太常少卿分司西京遷光祿卿卒

方龜年

按莆田縣志龜年景祐元年進士與蘇緘齊名仕屯田郎中所著有經史解題羣書新語

方僑

按萬姓統譜僑字次山莆田人景祐初第進士歷知循州陰察不法吏數人流之郡中肅然移潮州民喜曰循州方君也不教而服兩州皆爲立祠

方次彭

按萬姓統譜次彭字公述興化人皇祐初進士出知梅州民甚愛之在州六年兩被褒詔元祐初賜三品服引老歸從弟公袞元豐中進士嘗以布衣被薦條奏十事神宗嘉納之從子醇道知南劍州以諒謹自持有杜陵詩評十卷

方仲謀

按尚友錄仲謀青溪人嘉祐中進士累官殿中丞工詩有雉山集二十卷

方圭

按萬姓統譜圭好爲惡詩仁宗朝宋庠知揚州圭來謁燕於平山堂圭誦詩不已適見野外有牛就木磨庠謂坐客韓詵曰青牛恃力狂挨木詵應聲曰妖鳥啼聲不避人圭悟其意飲散擊詵

方惟深

按莆田縣志惟深字子通父龜年葬姑蘇因居焉舉進士不第晚爲興化軍助教王安石最愛其詩精詣警絕謂元白陸皮有不到處

方宙

按萬姓統譜宙莆田人僑之子熙寧中進士召對除司農丞章惇蔡確蔡京交薦之將處以臺閣宙恥之力請外補得京西提舉常平奏乞給還程頤舊田范鎮子百揆在謫籍中皆爲論奏官至轉運判官

方价

按萬姓統譜价初名儼慎從孫熙寧六年進士大觀初知安豐縣用薦召赴都堂審察蔡京以价不謁私肯報罷復知侯官縣已而掛冠里居二十餘年終曾孫禧爲殿中侍御史初慎從在嘉州手植

荔枝子郡囿賦詩有留取清陰待子孫之句至大觀中禧持節按蜀部嘉州父老擁車誦慎從詩爲賀

方會

按莆田縣志會字子元熙寧九年進士調揚州司法叅軍以薦移建州教授以集英殿修撰知河中府朝廷陞十帥府遴選守臣以會知越州充兩浙安撫使繕城隍創樓船上水戰法政和二年召還入對徽宗獎諭再四累爵文安郡開國侯卒贈太師

方澤

按萬姓統譜澤字公悅宋神宗朝守鄂渚有題南樓畫閣詩山谷過之登樓次其韻二篇又作詩寄公悅末云庾公風流冷如鐵誰其繼之方公悅

方公袞

按萬姓統譜公袞字汝補次彭從弟也元豐初用薦者以布衣上殿條奏十事曰教太子舉實才獎清吏擢恬退禁鼓鑄嚴茶商恤民困寬州縣減丁錢益戶口神宗嘉納命以官爲潮州教授復登元

豐二年進士擢諸王宮教授與韓魏公相從最密魏公語曾公亮曰方公袞論事剴切正而不阿立己公忠清而不撓豈多得哉公袞嘗錄其言行曰魏公遺事年未五十卒

方元案

按萬姓統譜元案字道輔莆田人僑從子少與程頤同游書問徃復至數十紙有曰足下非混俗之流其志道之士又曰老夫怕執筆非吾故人不復作此書仕終宣義郎威武軍節度推官

方叔完

按萬姓統譜叔完僑之子也宋元豐中補知候官縣民以築港瀦水害懷安民田二邑交訟叔完徃按之曰吾爲令豈私吾民耶乃命改築時曾鞏以文章學術帥郡於人少與可叔完獨爲所信任檄權節度推官且表薦之移知祥符縣

方君式

按萬姓統譜君式與毛國華從東坡遊有詩刻石

方蒙

按萬姓統譜蒙字逢原桐廬人與弟鼎俱登進士第而蒙尤有聲元祐間爲殿中侍御史三子元修元若元矩皆有才名元修爲州判元若爲右史元矩亦典郡

方軫

按寧波府志軫字克載閩莆田人後居鄞登元符元年進士授太廟齋郎大觀元年上書言蔡京睥睨社稷心懷不軌專以紹述熙豐之說爲自謀之計內而執政侍從外而帥臣監司無非其門人親戚又使子攸日以花木禽鳥愚陛下使不知天下治亂臣以爲京必反也上以示京京取其疏自辯上令御史臺進攝取伏辯以聞付軫詔獄父通諸王府翊善詔罷職勅軫貸命追毀出身以來文字編管嶺南尋放歸政和間復詣登聞鼓進狀乞收權獨斷毋使國賊肆志上以軫長惡不悛編管永州後以收燕雲恩赦放歸靖康元年復收叙其父通尙在亦叙原官軫還鄞縣令貧不能歸遂占籍於鄞

方适

按萬姓統譜适字彥周元符中以特奏對策乞復元祐皇后又上書議時政崇寧中入元祐黨籍

方逢嘉

按萬姓統譜逢嘉字君會淳安人領漕薦任無錫尉調轉船兩倉司事凡知者累以文學政事公廉明敏薦俱辭不就歸隱于馬巖山號巖隱

方聖時

按萬姓統譜聖時永嘉人父端以文行爲歐陽公所器重聖時生未晬而孤力學苦行敝衣糲食處之裕如自號愚迂翁其友朱敏功贊之曰顏子之愚仲尼之迂旣愚而迂斯名不違大觀初詔舉行義郡以應選固辭不就李季仲志其墓

方祐

按萬姓統譜祐字天貺慎從曾孫爲人恭約好禮嗇己厚人高價買產賤價糶廩值荒歲則傾困無吝色每綸巾野服徜徉道旁野叟村童歡喜出迎曰長者來矣飢食寒衣病藥死棺人人滿意其孫萬少時讀書至己所不欲勿施於人祐語之曰此吾生平受用得力處小子識之祐之存心如此故時人以長者稱之年七十二卒葬福平山後人因以福平長者爲號云

方閼

按萬姓統譜閼淳安人與弟閼聞同居太學每試必迭爲之魁時人語曰兩浙三方天下無雙閼仕至判南京國子監

方閼

按尙友錄閼字彥和淳安人年十八與從兄閼弟聞同業太學每試必迭爲之魁一日閼與閼方食藕忽一士子來曰一轡西子臂前一夕兄弟皆夢有告以七竅比干心者於是同聲對之閼歷右文殿修撰至金紫光祿大夫致仕賜號龍亭居士

方聞

按萬姓統譜聞字彥直聞之弟也年十五領鄉舉徽宗幸太學試策問得聞所對御書詞翰俱優四字遂賜釋褐歷太僕少卿至銀青光祿大夫

方元修

按萬姓統譜元修字時敏桐廬人侍御蒙之子也自幼有詩名政和初審察監大觀庫後通判潯州

嘗同呂居仁趙才卿入大名幕其詩善鍛鍊咏梅花云北枝風力顧不蚤東閣詩情聊一新尤爲人所稱誦

方廷實

按莆田縣志廷實字公美政和五年進士爲御史臺檢法官除監察御史尋以宗正少卿被旨宣諭三京淮北廷實至京西先朝謁陵寢見永昌陵而下皆遇驚犯泰陵至暴露廷實解衣以覆之比還求外補除直徽猷閣提點福建刑獄海寇竊發廷實用以盜禦盜盜相繼遁去改知泉州丁內艱服闋除廣南東路提刑卒於官

方慤

按萬姓統譜慤字性夫桐廬人性至孝父死廬墓喪畢不歸政和中領鄉薦覃思積年著禮記集解書成獻之朝詔頒其書於天下及居官所至以剛廉稱家置萬卷書堂雖耄年不釋卷朱熹嘗曰方氏禮記解儘有說得好處

方臘

按宋史童貫傳方臘者睦州青溪人也世居縣場村託左道以惑衆時吳中困于朱勔花石之擾比屋致怨臘因民不忍陰聚貧乏游手之徒宣和二年十月起爲亂自號聖公建元永樂置官吏將帥以巾飾爲別自紅巾而上凡六等不旬日聚衆至數萬凡得官吏必斷臂肢體探其肺腸或熬以膏油叢鎬亂射備盡楚毒以償怨心警奏至京師王黼匿不以聞于是凶焰日熾蘭溪靈山賊皆合黨應之東南大震發運使陳亨伯請調兵徽宗始大驚亟遣童貫譚稹擊賊諸將劉延慶王稟王渙楊惟忠辛興宗相繼復所失城生擒臘及妻邵子毫二太子僞相方肥等

方庚

按萬姓統譜庚字彥通淳安人宣和間擒臘寇破兀朮累著忠義授承信郎子五人文燧文博文郁文思文韜俱授承信郎文郁爲進義校尉知桃源庫務

方喜

按萬姓統譜喜字良翰提舉臨之孫辟燕山功曹掾燕雲陷敵令一時陷沒者悉以告喜南望賁涕盡取出身文字焚之惟留承奉郎告置衲衣中道梗不得歸給與講好防禦少弛喜變姓名攜數稚

古今圖書集成
間道逃歸抵廬江邊守以聞得旨特轉一官改差泉州監稅比還家鄉人環視歎息以爲換世人形之歌詩至比蘇屬國言其在燕十九年也後通判廣州終於官

方暄

按莆田縣志暄文安郡開國侯會之子光州司法叅軍始會在壽春愛羅山之境因葬焉建炎初維揚告警散兵兩淮發人塚墓暄恐會墓不免號泣赴援遂遇害

方疇

按萬姓統譜疇字耕田弋陽人建炎初進士紹興改元上書言四宜憂十宜行一宜去又言擇宗室爲儲貳除刪定後爲建康通判卒有文集二十卷

方允武

按宋史朱蹕傳方允武者衢州人武學上舍補官爲常州宜興巡檢建炎三年金人入縣之金泉鄉允武率土軍鄉民迎敵力戰而沒

方致堯